

四庫全書

集部

欽定四庫全書

桐江續集卷十六

元 方回 撰

送胡子游學正

詠

俗徒紛云云章甫殊不競不競何以故無奈二氏橫予  
曰實不然請各言其行開闢古至今儒道獨也正柱史  
玄牡門專氣保清淨末流詭長生妄欲奪天命靈山見  
作用誤認氣為性輪迴豈有之怪繆莫究竟兩俱可鄙  
者巫覡事禳禦愚氓惑幻說往往墮坑穿旣曰身出家

粉黛侈婚娉豈不交鬼神酒肉厭韁簪此曹浪夸毗內  
衰外徒盛吾儕讀何書堯舜至孔孟搶攘干戈後學校  
幸未屏窮者伏閭閻甘忍饑寒併仕或為冷官官冷亦  
何病寧戚半夜歌曾點暮春詠求已勝求人自重豈容  
輕東家子朱子述作貫百聖遺言一一在足可雪几映  
省察中為和存養義由敬上泝周程張例不顙宰柄乃  
有功斯文如揭日月鏡韶音一以還二氏噪衛鄭榛蔓  
彼自迷我此松栢勁歷觀史傳間不學行國政喪亡竊

威福依附涉巧令異端伺罅隙磨牙騁譏評前哲貴內  
脩韞匱寧待聘信有飯不足未羨庖欲清勉哉子此行  
始終抱淵靚萬一際竒逢定作蒼生慶不然歸去來預  
戒菊徑迎

次韻徐贊府蜚英八首

併序

蔡季良從許公度使君行縣倡和詩各四首婺  
源丞徐君辰起入郡城和以見示其出入阡陌  
陟降川嶺可想而知也予此和亦以紀吾鄉州縣

官多賢者云耳

長官行縣課農書耕叟治田賈趁虛上到嶺頭望應喜  
人煙今密舊時疏

高低田水入溪流溪岸間橫野渡舟麥飯家家甌中有  
永無犧佩起山頭

樹形萬怪石千奇我亦曾行亦有詩焉得一官如長吏  
出郊長是看山時

懸崖複嶺間岡坡如此天邊遠碧何誰道此中曾得句

道傍老樹閱人多

騎入州城出縣城不湏人送不湏迎連峯峻嶺崎嶇極  
政自胷中掌樣平

摩拊惄嫠達下情領州作縣總書生清詩要自清心出  
比自新安水更清

屏除呵殿少人知隨馬囊詩更有誰五百不來村落靜  
自然生齒似螽斯

老農持底報君公十日甘霖五日風夜靜山中看天象

福星偏許照江東

次韻金漢臣喜雨

山高田易旱已過一旬晴  
豈止商饑飽真成決死生  
甘霖三尺透病體十分輕  
想見琴堂老催詩意倍清

夏日小園

山中豈不樂奈無田可耕傍宅蒔荒圃長夏日閒行行  
倦即獨坐時聞幽鳥鳴剪花汰葵冗護筍觀竹成詩就  
意偶到事罕心無管忽復佳客至取酒相與傾熟醉徑

高臥頹然忘送迎  
餘齡能幾何  
聊用遨此生

戊子生日

去年苦雨客西湖  
湯餅經營至午無窮老復能逢順境  
歸林聊得保殘軀  
親情飲食煩相問朋友歌詩似稍腴  
永感情懷更衰病可憐兒輩事危厨

生日病腹疾書事

今年六十二棄官八年矣生世業已休來日凜無幾孰  
謂嘗作郡旦暮窘薪米少時頗豪宕晚乃窮如此此事

非所憂所憂學業圯孤卧僅一榻疾讀動千紙積迷如  
望洋頓悟不違咫深井未夏寒自汲洗手水心更潔於  
手時以理趣洗平生大繆誤豈不習經史搜覽浪該博  
著述墮浮靡詩雖稍得名往往語多綺夙愆奚庸追舊  
嗜差可止迴車導大路千聖同一軌茲晨記吾降益復  
感髮齒忽虛苦下泄乍實結中痞道在果何懼朝聞夕  
可死朋友挾壺酒卒爵強告旨敦篤謝親姻輯睦賴鄰  
里人情不容拒羔鴈間豆篚酢賓有故常勿藥姑少俟

清庖作湯餅。霑丐兒女子。菲饌徹。餽餘稍亦及。僕使老夫且伏枕。萬事莫掛耳。處約猶處樂。可不省。諸已俗競。徒榮願退脩。寧貴趾。幼者日以長衰邁。斯可揣要令百裸後知有老居士。

五月十四日梅雨始通走筆二十韻

邇日豈無雨。東有西或無。有亦僅鳴瓦。不肯鳴庭除。簷聲尚難滴。況望浮溝渠。滂沱靡後繼。霹靂空先驅。山田半未蒔。時早青苗枯。切慮旱勢迫。莫辦暑氣甦。去歲當

此際浙鄉渺為湖窮冬六十日所至雪塞途無乃天力  
竭有如酒家壚甕盃夙傾倒遂絕來者沾或謂帝有赫  
豈忍氓畢屠久蓄必大泄勿遽宜少湏鄰寺鐘鼓晦頓  
與常時殊果即驟傾注屋漏衣巾濡平明視荒園破鞋  
涉泥途詎惜葵卉仆但喜豆葉腴西溪報橋斷渡舫若  
小紓遙想農出野蓑笠爭奔趨吾雖乏良疇窘饑意已  
綠天下免溝瘠敢嘆瓶無儲

五月二十八日塘頭小集呈同遊劉元輝楊復之

山中五日寒霖雨久不止稍稍雲意開颸颸日色美駕  
言出東城道傍翫流水胷次積滯悶一見似可洗問訊  
元方兄太息雍端子養性在知命制事當達理病乃老  
人常貧非志士恥時運縱衰謝見趣肯卑鄙荒野叩槿  
援幽軒俯蓮沚吾友跫然來君子有酒旨青甘剖嘉瓜  
碧脆摘新李加籩何必多真率故佳爾學道氣臭合成  
文笑談綺鳴禽窺林間跳魚出波底驚見我輩人未有  
客如此良晤匪易得淺醉彌可喜會當時盍簪斯樂未

云已

六月初一日次韻酬元輝

吾不及淵明愛酒未能止不仕亦有祿賴此天之美年  
攬飢腸憂旱復憂水邇來甘雨調惡况已一洗原缺二字

佳人復古綿真附子服藥焉用多寡欲即將理固窮豈  
無說屢空詎足恥彼以盜賊富乃茲所深鄙懷人渴儀  
刑秉芳在中沚心賞於焉臻酌水味亦旨况有杯中物  
脩以來禽李清談有餘韻草木亦側耳雲霄自旦興丘

壑且園綺向來榮進念腐泥沉井底相與賡醉吟所樂  
不過此寄語亨衢人可弔不可喜猗嗟楚子文庸肯愠  
三已

送嚴陵汪學正巽元併寄趙賓陽

子去桐江路諸生迓水濱為言前郡守獨憶老詩人揖  
拜衣冠古歌游棟宇新故吾誰見念辛苦戰塲塵

次韻元輝昨游

藕花菱葉忽明眼此地聊乘解愠風無酒尚堪翻作有

蒼顏終不變為紅虛聲浪漫盈天下急景奔騰過日中  
萬事可容着心力邇來詩句亦忽忽

贈程山人

永昌

青囊遺論究幾深屋宅為陽墓宅陰元出易中後天卦  
更憑心上指南針故知形勝從來有難必榮華此處尋  
周洛秦函條輿廢豈虞山水喚之今

風水家之字  
水今字山

五月六月雨寒二十餘日

五月今年更索裘窮山積雨冷於秋斯須變化真難料

宿昔沉綿幸少瘳老強讀書猶有益貧因知道故無憂  
葵花零落渾閒事且望田家早稻收

慵起

慵起披衣出戶遲今年最喜免招醫粗容破竈炊雲子  
可用芳筵佐雪兒醉後作詩多不記夢中讀易了無疑  
雨晴風爽園林密獨立清陰過午時

次韻金漢臣雨後病起見寄

故鄉萬里思親遠客  
館孤身度日長佳句

也

一自蒲蒼弔楚湘倏成炎溽乍陰涼恨無帷上如飛馬  
徃問齋中獨宿牀病起精神如雨止懷歸愁思與天長  
何時共原缺二字詩說直上高峯看夕陽

暑天

暑天無暑荷天公似覺吾家亦未窮蔭傍漢朝名將樹  
涼分楚澤大王風洛遺書訂三焦誤河負圖觀一點中  
忽藉流螢足詩句黃昏燈熠起林叢

五格物六養心

次韻金漢臣喜晴

雨足秧疇始放晴鄉鄰所至有歡聲宰公明察無冤獄  
太守辛勤自勸耕我昔黃童成白首誰今赤子視蒼生  
定知米價秋來減遍買村醪處處行

夜望

夕陽已下月初生小暑纔交雨漸晴南北斗杓雙向直  
乾坤卦位八方明古人已往言猶在末俗何為路未平  
似覺草蟲亦多事為予淒楚和吟聲

早起

萬事崢嶸入夜思  
稍欣無病且無飢  
山田望稔秋收近  
暑月乘涼早起宜  
暗撚鬚髯驚露濕  
倦爬疥癬喜風吹  
買薪汲水營蔬茹  
草草盤飧了一炊

次韻送胡教諭炳文如金陵二首

子有山中田何不力自耕  
曰予抱奇志犯輶為此行  
於茲匏瓜繫曷若鳳凰鳴  
徒步未可料一日秉國成老夫  
察時義不待易四營大物苦難運  
高位防易傾苟且忝  
一命奔走疲送迎鄉里政自佳  
歸來訓諸生

治郡愧坐嘯歸田服躬耕始覺少年誤浪作萬里行書  
傳極古汲詞藝爭先鳴豈知老欲死一事終無成之子  
初遊遠物務思經營北望中原濶東視長江傾金陵冠  
蓋地豈無倒屣迎心賞少不至謹無負平生

送金漢臣明府徐蜚英贊府還婺源

星源長貳兩賢者丰采精神玉不如詩外更工長短句  
腹中何限古今書平生事可心無愧我輩人常氣有餘  
記取孚舟亭上語定應時復寄魚書

哭從兄良遇

先叔父九貢元琛字元獻子也名缺年明毛鄭詩兩請漕舉甲申生近六月十五日卒年六十

五歲長回三歲

先祖五男子其下八男孫白首涉患難僅餘二老存兄昔健如虎行步疾飛奔長眉具壽相脩髯當風掀千丈聳巨棟一朝成枯根強者尚若此弱又其奚論惟兄負剛勁臨事簡不煩可否率正色臧否多直言談笑無城

府其實春和溫愴壬有弗察平地生離寃惟揚赴逮對  
乃用怨報恩十年歸來乎下帷董生園此死幸無愧彼  
生非游菟春官一再上科名合高騫世事旣鼎革何如  
偃丘樊百里許起家性終不耐喧軍馬塵未已朝夕常  
閉門劣弟解彫郡生理古井眢時復造兄室釀酒崇盤  
飧二月近生日爛漫傾芳樽豈謂三四月醫藥昧病源  
平生無妾侍寡欲培真元焉用艾與附内外加炮燔五  
月二十八了了語不昏為後取猶子愚哉真犬豚此事

未稱意似難它選揜委曲進寬譬且望進粥飮乃後密探問不敢踰闈閣諸幼日傳報精神稍昂軒奄忽季夏半長往遊厚坤走赴氣已絕號慟書靈幡回書其靈凡之幡曰全而

歸之歿也吾寧也憶兄舊論議亹亹雙袖擅口齒未即閑飯含莫

嚥吞蓋棺一何速迫此炎暑祚衰蘭抱怛痛哀聲嘶霜猿人生孰不爾屈伸手覆翻考終亦一福拱璧無瑕痕丘嫂撫孤稚匪伊將冠婚或者氣質變培壅成蘭孫寒宗弱一箇繆居昭穆尊上當相宅兆安厝居高原下當

教貽厥敬恭奉蘋蘩秋風幾黃落我亦超崑崙焉得天  
地間長掛扶桑暾

坐看南山雲二首

晨起無一事坐看南山雲為雨殆可必盍然心自欣耕  
疇已久捐穠歲猶願聞匪惟救阨餒兼足蘇惔焚升降  
地天泰兌艮通氤氳高能以虛受能下斯為君宇宙儻  
非爾函靈焉不憤吾生與草木幸茲同芳芬

幽林響欲滴夜色始欲分扶桑定已紅星象收其文尚

復有飛鼠撲擊空中蚊湏更兩滅迹寂然藏紛紜鄰煙  
氣稍上谷禽聲漸聞七月入伏未未減炎暑熏皇后漏  
雨意似閔黎庶勤此心誰予知坐看南山雲

早起

調和風雨順星辰幸是人間自有人老賴獨眠無疾病  
閒能早起更精神曾中羲后先天易物外無懷太古民  
頗怪吾廬舊山色不隨時世與俱新

野趣居士楊公遠令其子依竹似孫為予寫真贈

以長句

爾來畫工工畫花俗眼所識惟紛華牡丹百卉閨蜂蝶  
芙蓉鴛鴦相交加大為屏帳小卷軸堆紅積綠供欽奢

高人瞥見付一笑婦女小兒爭驚誇我愛楊君畫山水  
要自胸中有妙理巴東巫峽猿夜鳴洞庭瀟湘鴈秋起  
皓月明河萬里天淡墨掃成頃刻耳舊與結交三十年  
今老而歸識其子是父是子皆詩人每一相逢佳句新

西風蕭寺父謂子寫此前朝朝士真自言畫是作詩法

狀貌之外觀精神忽似老夫對明鏡翛然雪鬢烏紗巾  
野態愁容本難畫問言何得此奇怪得諸苦心熟在手  
郢人斤斧由基射腰圍不用黃金帶象笏紫袍貧已賣  
只消結束作樵翁看山獨立長松下大楊居士醉曰然  
小楊居士呼來前眉間更着缺毫一縹渺詩仙仍酒仙  
汝不逢我作郡年此直當酬百萬錢今旣無此無可言  
聊復贈之歌一篇

守孫滿歲長子存心之  
子八月八日

升沉榮瘁可湏論古鏡當空了不昏莫笑今踰六旬叟  
頗欣已有兩男孫特牲與子羞家廟聯騎何人叩園門  
急掃秋亭真穀果涼邊爛漫倒清樽

贈刊印朱才俊

科斗何年變篆字至秦程邈翻為隸今人但習真草行  
誰會六書三耦意篆所最難柱與圓學打一圓費三年  
豈容臆決蔑師授汨沒形象迷傍偏九江法帖鐘鼎刻  
兵火以來猶可得人間亦有說文本臣翶反切臣鉛釋

朱生贈我古印章奎躔璧度森開張自言少小嗜此藝  
意欲徑上陽冰堂細觀刀筆最佳處頗識傳箋通訓故  
苟焉餽口棲此身元來亦是知書人

不寐

孤燈獨榻夜難晨秋氣初寒展轉頻每怪未嘗成夢寐  
自怜何苦費精神非闕世事兼身事欲學賢人與聖人  
更著冰霜當七十向來虛費幾青春

中秋前一日雨送瞿栗戎葵子與劉元輝

小雨翻鋤土帶沙戎葵罌粟送詩家敢爭天上中秋月  
且種人間隔歲花小稔米今猶未賤固窮酒可不湏賒  
乘閒儻肯來相過有水吾能自煮茶

次韻元輝中秋雨

良辰合與一樽酬有酒無朋也自愁萬事只堪花老眼  
一年又過雨中秋鳴砧處處淒鄰巷擊柝相望起戍樓  
更着亂蛩環獨榻平生天地付神遊

題汪氏孝節堂

汪逢辰母張氏嫁五十三日寡時年二十二守志今三十一年矣有

司表其門曰  
孝節張氏

三從分定付之天捧案曾無月再圓菜子方同綠衣舞  
廊風忽賦柏舟篇頻年兵革經多難奕世門間喜獨全  
孝節從來足陰相兒孫袞袞壽眉前

喜馮伯田至

坦

扁舟相送浙河濱又向苕溪住幾春雨路遠來應跋涉  
雪眉聞說尚精神山城風物非他日詩社交朋不數人  
畧遣後生識前輩揮犀為洗庾郎塵

夜思

夜氣侵寒薄寢衣。迴頭六十二年非。直能欹枕思時透。  
始覺挑燈得處微。百蟲漸侵床畔語。一螢忽入帳前飛。  
研朱點墨皆陳迹。見道元來自有機。

次韻伯田見酬四首

久缺牋筒到雪濱。相逢依舊氣如春。深藏尺璧元無價。  
時擊圓著尚有神。桑梓兵戈三峽路。衣冠文物五朝人。  
片時略得陪清話。一掃胷中萬斛塵。

世故吾其問水濱向來不合典班春一從去作滄浪客  
幾度重題齋壘神垂死豈堪思往事忍窮方欲作閒人  
喜公強健猶如故未有清樽可祓塵

半年洄泝越江濱每愧羊裘老富春歸隱尚能聯比長  
出遊復肯祭行神枯腸近飽三爻夢宿齒宜肩四豆入  
能顧寒齋共芳茗蠹編時為拂蛛塵

六橋久客舊湖濱春日花開不似春游學頓無福建子  
科名更說梓潼神暗驚淵寶丘夷事枉作書癡傳癖人

辛苦湘累辨蘭父莊生齊物等埃塵

次韻仇仁近有懷見寄十首

我能納祿君辭聘大覺蓑衣勝袞衣有徑弗行緣畏險  
無形可見要研幾就令枵腹常亡賴儘勝枯骸永不歸  
何限戩門委荒草高堂猶記舊巍巍

誰識虛翁此一虛歸來不歎食無魚早聞曾撰異三子  
近喜陶詩賦二疏但苦老身多疾痛時呼醫士問方書  
君知湖海元龍否豪氣年來已盡除

老玩章編尚可為復能吃口對期期離明偶剔書燈見  
坎止因斟硯水知豈厭微塵裨泰獄只愁殘照近咸池  
兒曹未悟侯王夢不了邯鄲黍一炊

身歷干戈百戰塵休官仍似布衣貧每看事有難行處  
未見心無不愧人秋稔粥餧猶可繼夜涼燈火已堪親  
閉門讀易吾謀決莫用著龜問鬼神

寄來詩卷了無塵想見家貧道不貧真復遠追前輩味  
頗驚頓異去來人驅車蕩蕩行湏至破的遙遙見已親

換骨得仙內丹熟可湏浮海望三神

少年忽作白頭人慷慨悲歌豈為身屈子獨醒天可問  
重華久去士常貧餅無儲粟陶元亮馬似乘船賀季真  
此味孰能相識察隕霜碩果有餘春

漢廷簪綬簉金張初服逡巡返士鄉勇退能為疏傳去  
過剛似勝次公狂庭梧隕葉元非死秋燕辭巢不待涼  
玩物察時遠災咎不湏空熱九迴腸

守雌甘似不鳴將靜者無庸手脚忙沮溺故難同孔子

孔子可沮  
溺則不可  
綺園何獨避高皇

做不得  
不取出

星移斗轉光陰疾

林密山深氣味長  
萬事灰心如嚼蠟  
唯餘杯酒未相忘

猶喜看書懶作詩  
暮年自合省云為  
預知陰雨骨骸痛

怯上好山筋力罷  
不寐有時忘數息  
無疑焉用扣歸奇  
寄聲為報仇香道  
近日交朋獨爾思

相從汨沒走泥塗  
忽又還家半載餘  
把盞何由嘗我酒  
典錢猶憶借君書  
兒孫十輩娛詩老  
梅竹千株護野廬  
東望懷人屢搔首  
能來相訪定何如

訪臨川楊仲權于天慶

隱居何所為性懶絕造請駕言東城東恍兮異入境脩廊寂無聲未忍踐竹影獨立味玄澹徐步入深冷秋光照虛庭拱揖冠服整中有專氣翁學道早脫穎誠極語謝飾幾動意潛領煮茶雜椒榦累酒粲梨樽悅神良會稀遺物閒晷永休官陶元亮遯世陸脩靜異代復同調霞外茲可騁研幽挹高致探妙發遐省何言壺中天心遠塵自辟

音丙

九日約馮伯田王俊甫劉元輝

山雨初開一望之似無筋力可登危每重九日例淒苦  
垂七十年更亂離今歲江南猶有酒吾曹天下謂能詩  
肯來弔古酣歌否恰放黃花一兩枝

兩日前私忌

次韻王俊甫山長九日登烏聊二首

山色初明小雨開可容無地拓襟懷荒寒試與登臨去  
奇崛能隨感慨來何限詩愁闊世故終憑爛醉了生涯  
風流二謝猶堪恨俛首劉郎戲馬臺

江邊危阜俯江臯去馬來牛細若毛古道向來元寂寂  
俗流何處不滔滔漫拈老筆雕空濶徑命芳樽洗鬱陶  
天地年年有搖落悲秋端謝楚人騷

次韻孫元京見過言詩

騷壇爭長各稱兵未卜誰歟霸業成欲療左盲治穀廢  
合除白俗掃元輕屢更落落心猶壯常恐空空氣驟盈  
據險作難終未是賴公指示軌圖平

眼底驚嗟見此流祇嫌接對未云稠蘇門逸響追長嘯

湘浦餘情續遠遊  
新息今湏乘果下  
襄陽誰漫釣槎頭  
吾衰久矣公猶健  
好控飛車跨九州

九日詩  
馮伯田王俊甫劉元輝楊泰之見和復次

韻二首

空經虛緯費來之  
弦急常由瑟柱危  
壯似陰山歌敕勒  
悲於易水和漸離  
崎嶇萬古無窮事  
酩酊重陽幾句詩  
剝喜故人會  
吾意東籬何日醉  
殘枝

歸來誓墓學羲之  
政坐機張觸處危  
久已光芒韜巨闕

更能文采眩長離秦書方朔三千牘飲酒淵明二十詩  
索米長安饑欲死何如終保傲霜枝

寄還程道益

直諒

道大

直方

昆季詩卷

朱文公謂吾州山峭厲水清澈故其人物亦然  
而文章亦然婺源之山尤其峭厲者也其高為  
江東之脊而水之清澈者分而為二東為揚之  
水由富春瀨錢塘江入于海西歷彭蠡大小孤  
揚子江入于海予讀程君直諒道益直方道大

賢昆季詩殆猶水之出於是山也其派二其歸一其清澈本於峭厲而其渾浩汪洋極於海則不見其迹矣因賦吳體寄之曰

山水吾州稱絕奇間生傑出當如之不行天上五嶺路  
焉識人間二程詩無逸幼槩金華似才翁子美歐陽知  
怒流洶湧各分派萬折到海夫奚疑

為黃仲宣賦山中四章章四句

山中之朝有溪可瓢飲我之水亦逍以遙山中之暮豈

不風雨心與一燈耿耿千古山中之人耘夫耕民鯖厥  
五侯其如子真于疏于躋朋來其學彼惡知茲山中之  
樂

承金漢臣寄詩將及一月次韻奉酬併呈徐蜚英  
千里秋光一倚欄危樓四望碧雲寬遙知對壘分詩將  
未覺同舟怯縣灘九日與誰同把酒八年如我倦彈冠  
會難別易駒陰迅時展來篇細細看

張滁州

庭簡

挽詞二首

迪之號古崖年七十五令祖與先君同榜入上庠

世變古來有人才時豈無已移甄井璽猶握釀泉符壽及周三老名成漢八厨彼哉武斷者盜起欲全軀

上庠同補處祖父昔通家書在燈俱續舟移劒共差故都箕子麥晚憶邵平瓜五福公無恨吾生自可嗟

漢臣明府與公度使君話吾州山水之勝有詩次

韻二首

繡作羣峯玉作川筆端秋思浩無邊賜金增秩從民借

會費將軍九萬牋

秋容洗雨鴈浮空牛斗之南江以東是處皆為群王府  
誰家不似水晶宮君侯總是文章伯文物差宜錦繡胄  
緩馬倚樓隨所適高情長在醉吟中

次韻金漢臣五城道中

郊行曾次爽於秋歲稔天寬百姓憂但有樵人歌隴上  
永無廷尉望山頭最宜曠野開詩思未覺他鄉動客愁  
想見霜林疎更好綠陰時節憶曾遊

次韻漢臣閔口渡

歲月匆匆鴈往迴馬頭西去又東來不知自有乾坤後  
幾度蘆花謝復開

九月三十日漢臣置酒次日有詩次韻

槁梧策策晚風秋始覺天邊雨意休掃盡陰霾供一醉  
豁開空闊慰雙眸青銅未至無王老紅袖何嫌有莫愁  
我亦放顛插殘菊不羞衰老雪盈頭

贈壽昌墨客葉實甫

古人削竹以為筆木板為方竹為策其字科斗或鳥迹

或篆或籀煤傳漆未有今人所謂墨晉發汲冢尚可識  
地中間獲鐘鼎刻文為之具未為極何其妙哉善摹畫  
束縛毫管備肺飾鶴眼鳳喙鑿湍石黟楮剡藤擣成足  
松煙魚胞和堅密誇精鬪巧不遺力隸真行草最後出  
萬乃不能及古一有良弓矢無良射器利工拙繆繩尺  
風頽俗降嘆近日四寶往往俱難得尤艱得者墨一物  
燃爇膏脂礎桐實非膠太燥則太溢高價玄圭詭蒼璧  
其實不直瓦與礎羲獻不起歐褚畢亦無李杜大詩伯

顛倒吏牘冒儒籍乳臭小兒僅甲乙苟且研磨暗竄易  
奚李縱生懼稱屈壽昌葉老獨奇剗陟阪涉澗負囊笈  
直笏圓丸動盈百病風手試銅蟾滴歛灑龍光浮五色  
便覺硯中轟霹靂金錢亦不過求索但欲流名寄篇什  
噫嘻此一怪墨客作書轉送三歎息物有當黑不肯黑  
事有當白不肯白

題吳山長文英野舟五首夢炎

併序

江東祥刑使者盧處道取韋蘇州七字冠巴東

十字為紫陽書院山長吳文英作野舟扁將為  
亭於其所居之溪上郡人方回萬里咀二老詩  
下一轉語仍以己意續之成詩五首

春潮滯雨橫舟晚成就蘇州一段奇向使有人爭此渡  
韋郎眼底定無詩

下邽老子扶黃屋直上澶州城北樓遼陽鐵騎驚相問  
舊日巴東野水舟此詩謂寇公晚節大用成此  
大功其初乃巴東小邑耳

我有孤舟自天地沙頭問渡苦無人誰家賈船浮溟渤

脫命蛟龍亦損神

大才定復不求售至寶政湏能自珍一篙用着方知貴

只恐悠悠懶問津

世多漢水昭王事誰辨烏江亭長心君知此處真堪託  
天下無波可得深

喜程道大至直方約諸友二首

東籬殘菊未成塵所見悠然意尚真玉瓊常聞歌旱麓  
白顛何得賦車鄰欲遵飯顆山頭路合問深明閣裏人

賴是吾徒不全弱能來爾汝詰酸辛

攢眉抱膝一衰翁豈為區區口腹窮早向前朝聞諸老  
曾微晚輩紹遺風草堂詩到夔州後竹馬年思大歷中  
畧共清談商此事未妨傾倒一樽同

次韻金漢臣見雪聞鴈二首

山城酒薄客愁濃卧厭秋霖萬事慵九月十月忽飛雪  
北人南人俱笑容

月暗雲迷度杳冥飛鳴未肯落寒汀得無田里聲相似

獨此長官能細聽

寄題汪君若楫秀山高處

秀山高處我未到想見斯人獨嘯歌靜賞奇雲臨翠巘  
醉吞朗月上銀河異香染筆花間寫清影搖衣竹裏過  
愧無健句凌空濶奈此天邊絕景何

十月中澣酒熟客至分韻得菊字

采菊東籬下  
悠然見南山

亂離脫此生真復類殘菊嚴霜百草死愧我一影獨鄉  
鄰豪奪兒豈不金滿屋或乃盜賊起全家被屠戮賈禍

由稔惡寡悔勝千祿聊保兩鬢白時倒一樽綠客有可  
人至酒適今朝熟隔牆馬蹄響呵殿盛驕僕天邊本無  
物眼若送鴻鵠

以采菊東籬下悠然見南山為韻賦十首

九日已過一嘉菊無人采晴軒醉餘芳賴有我輩在  
着酒半許意濶浩如海誰能起九原共與推千載兒女  
較唇舌我豈爾能免

生者不聊生死者已鬼錄死視生或優冥默謝恥辱側

聞田野間十人九飢腹奈何值狼貪尚欲肆荼毒客去  
醉眼冷獨坐數殘菊

我詩無所師意畧與古同豪士見之笑寒苦啼秋蟲采  
菊忽見山不辨南與東奇句忽天來自斷孤征鴻豈有  
學聖賢而不忍飢窮

移石甃缺路折竹樊踈籬簷間見一蛛懸身墮長絲隨  
風有所罿羅絡縱橫施胷中密經緯似不過一飢用意  
爾許惡何待網成時

平生天外心異乎諸子者著鞭無前途焉用取竹馬乍

爭祖逖先肯出桓溫下黃鐘晚遭毀轟雷釜鳴瓦細玩

郊沙爻可不舉需足

音雅韻畧  
三十五馬

不謂予坦率即謂予繆悠冷官尚難為熱官何可求寂  
寂雀羅門無復車前騶但恐嚴光足終勝張禹頭客來  
且一觴十觴未遽休

士衡怒鬼子仲氏不謂然雲間對日下此語亦淺旃丈  
夫貴有立聲名動萬年青蠅能肆汚白璧詎改妍君但

滿酌我一笑吞青天

不見淵明面淵明心可見問何以見之老菊耐霜霰尚欲招祖謝豈不鄙湛羨市朝紛屠剥祿位甘苟賤高舉能免此學陶亦云善

正始有遺音衣冠落東南興午賴群賢歷年百有三吾聞運甓人功與王謝參晦儉佐宋齊賣國爾乃甘陶氏獨有孫飢死終無慙

今日見此山明日見此山有時或不見乃在雲霧間世

事亦如此反覆多阻艱陰晦待其晴山色終當還俗謂  
勿與競誓死保此間

贈相士李山屋

四十五萬坑長平五十六萬敗彭城頭小而銳重瞳子  
可謂善戰能用兵殺人何得慘如此不知天亦還殺爾  
世間產一虎頭相幾陣生靈為渠死韓擒彭醢不足悲  
無辜性命供娛嬉漢家宗社計未定商山老人歌紫芝  
相人相窮不相達天道好生不好殺豈無袖手閒書生

一着滿盤死碁活

贈朱師裕

并序

咸淳宰相大觀文馬先生

廷鸞

予春官座主也

庚午去國未獲再面戊子冬外孫霅川朱師裕

乃父前池州教煥文實甫攜以過予感慨不已

因賦此詩

相府違離二十年  
弁芳突見外孫賢  
故因高韻如袁粲  
豈但雄文似史遷  
兵甲喧逐征馬地  
音書斷阻去鴻天

因君畧得平安信諸老無多重愴然

十一月二十日南至二首

風吹六十二年春又見陽和一夜新興廢親更三國事  
死生暗易萬城人種花縱好誰同賞置酒良難自憒貧  
今獨身為本宗長思兄臨節倍悲辛

至節今年始得歸祀先牲酒亦無幾兒孫長大衣裝少  
婢僕頑慵廩餼微交阤虞翻猶不死荊州王粲竟何依  
玉筈已想黃鐘動只有心灰自懶飛



桐江續集卷十六

欽定四庫全書

集部

桐江續集卷十七

詳校官中書臣孫 溶

主事臣呂雲棟覆勘

總校官庶吉士臣倉聖脉

校對官典簿臣劉景岳

謄錄監生臣何 鏗

欽定四庫全書

桐江續集卷十七

元 方回 撰

馬軍自杭至雨少止

三月十五日

春盡雨還雨山寒雲更雲晝常無日色夜不見星文蜂  
起此狂賊馬來皆勁軍剋期可平盡玉石恐難分

予嘗治郡屢平賊嘆今所見不然

昔在專城日吾嘗破賊時土豪勤問探民戶感恩私公  
論必旁采下情須盡知騎軍遠迎擊孰識一先碁賊巢穴深

湏合軍力一舉必取乍進忽退徒掠平人則賊得志矣  
賊乏食必出巢四劫須土人謹探而先報我出馬軍迎  
擊之遠郊不使近吾城必捷步兵難用惟  
馬軍可以少勝衆一二箭可走萬衆也

十九日斬賊十二人始明正典刑

兵興欲兩旬三載氣初伸汝既甘從賊官非樂殺人早  
知膏白刃何忍效黃巾拙速無奇策登城悉市民

早大霧午大風寇銷兵解之象

驟合公超霧俄飛禦寇風大聲千里動陰翳一時空遠  
睇烽樓外愁吟戰鼓中所思何日見還得一樽同

二十一甲子晴

昨日大風聲今朝甲子晴整襟衣頓爽開匣鏡偏明早就鯨鮀菜終全燕雀成清和舊時節新麵入山城

二十三日天氣絕佳西軍還二十四日東如績溪獨坐綠陰下追思秋日春眠蠶方放大早麥欲嘗新豈意賊生賊忍聞人食人何時兵遂解縱遣上城民

四月初二日出兵恰滿一月百姓未得下城

久謂兵當解何知戰未休屬方甜筭蕨遽已艷葵榴是日

始見葵花紅榴尤早骨痛金瘡作心煩火色浮滿城俱閉戶不但  
一人愁予嘗於真州泛江大風跳船為桅竿之鐵鍵傷腰骨將風雨則破而痛又嘗他有所傷天陰則痛骨

四月初四日聞績溪凡十五都賊焚欲盡傍出焚  
歙縣之南鄉遂焚至昌化

昔日初聞寇諸人早出師焚燒寧太廣收勦已無遺斧  
鉞何曾鈍雷霆豈肯遲遷延非決策那得更狐疑

四月初九日清和絕佳聞賊焚歙南路蔓延五十

餘里

小園無客至獨坐一繩床霽日千林淨薰風四月涼禽  
魚完孕育草木競芬香姓命人難得何為有戰場

四月初十日得蜂蠶繭絲之句

深言懼忤時聊復一評之靡暇防蜂蠶惟工竭繭絲因循終不恤平定豈無期麥赭秧田廢人家半忍飢

聞移東兵勦南賊

破賊須先易行軍要出奇霆轟當不測烏合本無知夏

稅催科日秧田插蒔時掃除如少緩兩不便公私

客謂榴花早而多竹筍少歲旱乃返大潦

客憂今歲旱事已見幾微早早榴花密遲遲竹筍稀即

今防黠賊已若墮重圍更使逢荒歉嗚呼萬事非

草賊作耗

四十餘日東北西南四面起斷金陵錢塘路略計  
五大縣被焚太平宣徽三郡城守如被圍然也

四月二十日客言兵所不至麥有黑蟲食之

望望遙峯外行行茂樹中愁添詩鬢白旱覺戰塵紅已  
嘆桑無繭何期麥有蟲南薰元不改千古舜絃風

觀蟻遷知雨

行行密密復踈踈銜子沿階粟粒如幾夜夏寒疑未雨  
槐安國有五行書

四月二十六日雨後添嚴軍南擊賊寨

端許憂差減寧容病寢侵添兵蓐草冠垂早降梅霖寨  
破山無險田高水亦深著書垂不朽或可遂初心

四月二十七日梅雨甚驟

黃梅三日雨漏屋使人愁無飯不遑恤有書猶欲修綿

延蜂蠭賊震動犬牙州

寇在太平宣徽三州境而杭嚴池饒之接境皆警

兵甲

從今洗民窮尚可憂

是日潭等處水浸縣休寧江

江

四月二十九日早起行園

白髮蕭蕭一禿翁披襟扶杖早涼中偶因不飲全無寐  
自笑能詩例得窮梅雨園林江橘綠竹風庭院海榴紅  
若非守禦孤城閑誰有幽居似此公

白髮蕭蕭言老一禿翁言無版位江

橘綠海榴紅一作吳橘綠蜀榴紅

五月初二日聞祁門縣四月二十七日大水沒鼓

樓蛟龍鬪爭溺死者多休寧縣江潭等處亦多漂

溺

今歲知何處天刑亦慘哉潢池猶未靜洚水復為災民  
叛非無說官貪有自來祁門鄭龍鬪此禍又誰胎

五月初三日雨寒痰嗽

門外葵花一丈高詎期端午更綿袍佩符豈有玉剛卯  
挑藥久無金錯刀人老形骸宜瘦劣時危心肺倍焦勞  
柴門晝掩身多病聽雨寒牕首屢搔

五月十一日生朝三首

濁醪兒輩尚能謀且勿驚憂且勿愁不肯前朝義劣角  
乙亥年除監察御史右司牒皆不就可於當世較蠅頭永無紫綬金章夢

甘與青鞋布襪休旦夕賊平歲中熟茅柴杯外更何求  
本非高蹈掛朝冠自是危途舉足難世上十年人不識  
山中五月夜猶寒感風垂死骨骸痛止酒近旬杯杓乾  
牽率親朋致嘉惠時危敢作等閒看

强展愁眉進一杯年年紅熟見楊梅至親阻寇全無信

時貴嫌貧近不來京兆舊遊張敞馬督亢遙望劇辛臺

華榮寂寞手翻覆好在佯狂老萬回

予歸自廣南竹坡先生字以萬里名

則先君所命也故  
或以萬回戲之

五月二十一夜雨未止六晝夜水漲寇阻無人入

### 城

晝夜雨滂沱平疇變海河地如隨水去天豈厭人多討  
叛猶輸粟攻堅未掩戈積陰凝殺氣玄造意如何

五月二十三日甲子交六月節稍晴三四五復大

雨賊寨未下

每日看天色今年厭雨聲重新六甲換喜得一朝晴疲  
卒淹窮谷饑民守壞城竹深荷淨處猶憶舊承平

初二日許公度使君來自西坑賊寨見訪

曰予視賊壘雨且二十日山行屢顛仆泥行馬沒膝火  
攻未可施諸軍睨空碧小醜膽氣龐亦有砲與石持榜  
以招之貸命續糧食彼謂一下山求活豈可得使君廉  
且慈眉攢咽為塞未必皆兒徒脅從十有七暴露數月

矣武將正憤悒合圍焉肯退但欲事麿擊天意不肯晴  
詎不念寬抑渠魁謀遁逃所幸已就執焉得遂兩解曲  
赦與杖拭

六月初七日雨始止初八日始晴

昨夕星初見茲晨霧亦披溪聞平賊報先賦喜晴詩二缺  
字猶如舊新蟬未覺遲皇天已悔禍小醜復奚為

六月十七日十八日大雨聞賊欲降

誰遣青天變漏天人間無復有平田女媧鍊石端何物

子產縛龍未必然死徙銜冤終不雪生存忍餓更堪憐  
腐儒自笑窮今極旬月曾無一醉眠

六月二十二日守陴百姓始下城

本不食官粟亦令登敵樓鳴桴木杪急傳箭夜深愁暗  
躡蛇纏膝塵搔虱滿頭傳聞賊寨破今日得歸休

六月二十三日立秋喜聞賊平鎮將凱回歸府官

俱還

亂起杏花落賊平梧葉飛頓忘三伏暑竟解萬山圍大

將傷流矢諸軍曳血衣先登不如此焉得凱歌歸

寄題婺源程氏得窩亭

義叟年六十九  
子龍乙丑榜

今醉翁遨古醉鄉斯亭有路到羲皇九流人品杯中物  
萬卷家書膝上郎山意相迎隨步好花陰獨立滿身香  
臨風詩思誰能盡想見津津喜色黃

送歙尉牛寶臣璧

身騎瘦馬着練衣能儉誰云俸入微延禮老儒令子拜  
束鈴轡卒到村稀向來鬢漆今成雪此去袍青合換緋

爲報鄉鄰索南物錦囊惟有好詩歸

孚舟亭獨坐

肇確蒔私米淺清釣餓魚茲事不在多克儉即有餘俛

仰六十載山城八遷居

予前庚寅四歲歸鄉祖居大街一先叔父上北市居二先人上

北市居三紫陽門外居四東門外居五山脚下居六忠節營前居七最後買宋尚書家空地造居八憶昔

罷闥幕始有此屋廬鞠躬畚瓦礫流汗薅茅苴前後列

花菓左右環圖書誰令廁朝士又駕太守車大兵革宇

宙乘時沸猱狙麤掘壞畦逕抉偷夷庭除厨荒敗炊爨

室空移貯儲歸來問鄰舊死徙徒歛歟募工淘穢井課  
僕通汚渠旋理短檠燈復荷長柄鋤倏忽九寒暑出入  
無驢輿忍貧不肯仕人謂回也愚今歲事大謬羣賊屠  
郊墟古樹伐作薪野茹挑爲蔬淡食已數月窮乃至此  
歟筋力既衰劣鬚毛苦凋踈以今較疇昔百事皆弗如  
弗如又何嗟不繫天命且柴荆永日閑池亭秋露初朝  
看白雲起暮對丹霞舒獨坐心自賞是身如空虛

送郭伯川

皓首厖眉話昔遊隙陰俛仰歎如流萬山中遇驅駟轡  
十載前同上鶴樓洚水餘氓猶粥飯潢池小醜更戈矛  
紛紛貪吏甚狼虎盍與驅除絕後憂

初涼

餘民脫死初平寇歎歲逢秋亦喜涼止水池邊臨樹影  
逆風林下遙花香尚欣鄰壁肯賒酒不管空庖無宿糧  
已往可驚來未測延緣聊得撫流光

懷慙

逃生何處可茅庵城市山林總不堪人莫我知姑用六  
今非昔比更緘三壁麟行酒海深淺繫鴈傳書天北南  
數月兒曹盡饑瘦無能衰叟但懷慙

望南山別峰見樹間煙出知有隱者

南山有別峰石樹相因依茲晨偶流目遙見青煙微未  
知此林下誰家掩荆扉我亦欲一往結茅紉槲衣秋飯  
所種粟春羹自生薇今年四閱月孤城閉賊圍當其薪  
粲絕無翅何由飛客謂郊闢外似覺事轉非歲儉剽奪

急村荒遊徼稀豺狼方磨牙擇人以自肥市隱世態惡  
巖棲心事違四海豈不廣惆悵將焉歸

去萍草

童子攜竹器撫去池中萍見魚故已佳水底林巒青復  
呼荷鋤者薙草汎我庭蛇蚓無留藏行徑免露零剗穢  
致潔淨撥翳生晶熒朗月明其搏古鏡還精靈語寂理  
已會慮澹神自冥白髮一老翁兀然坐孤亭

送黟縣學官江浩歸上饒石湖精舍

小桃源住飯不足夜鶴傳聲趣駕還細嚼紫陽山色飽  
饑涎猶睨應天山

有感三首

倉皇得郡免朝辭十六年間老轉癡一角未堪戎解穿  
二螯敢笑食蟛蜞刊摩于寶搜神記嘯詠陶潛責子詩  
格是世人無識者可能更索樹神知

十年歸把釣魚竿萬變惟憑冷眼看白髮相尋點鬼簿  
紫金馬得返魂丹漸驚老舊遺民盡欲問承平往事難

秋日未湏畏殘暑浙江潮退即天寒

聞故舊多死者

今治古泝醉眉攢堪轉輿旋老眼寒晝靜倚檻常獨立  
夜深撫几忽長嘆關張運去金刀絕王謝聲沉玉樹殘  
欲淬筆鋒剗鬼膽生冤死恨海漫漫

聞汪翔甫八月十日卒去曹元會五月三日之報  
僅三月餘兩翁皆年八十四

甫作詩為兩翁壽豈虞相繼駭予聞八旬已過太公望  
一旦俱為冥漠君場屋少時嘗張王兵戈晚歲忽紛紜

全天所賦無遺憾端復真修地下文

悲歌五首

三十年前樂事饒閒身無事暑初銷攜琴嶽寺延秋月  
吹笛江樓過夜潮自倚豪狂詩句疾豈虞離亂鬢毛凋  
故人死盡身猶在交道生涯兩寂寥

更問公裳與幞頭披襟散髮十年秋郭郎鮑老元相缺  
張丈殷兄且自由善樂神仙惟有醉筭知天地本無愁  
奈何尚欲誅姦鬼亹亹寒牕筆不休

獨立蕭蕭落葉風閒居已忍十年窮幸猶張籍不終瞎  
未必杜微真是聾瑣事可容知較盡塵編敢謂讀皆通  
骨骸欲朽心神在未害藏山待至公

憂驚喜愕夢紛紛了了誰能白黑分晝夜星辰常轉換  
春秋草木互芳芬姬昌秦政今誰諱呂洞鍾權近不聞  
氣盡勢窮終變滅世間萬事總浮雲

窮兒極詐肆淫貪賓主湖山晝夜酣世事可欺沙武口  
天誅難免木綿庵貲財已籍官宜褚腰領猶全首欠函

地下麗華應有語不因玉樹失江南

贈黟縣星學舒碧雲俊臣今俊民

原夫官賦省題詩何乃甘心改業為場屋久忘塗注乙  
星辰閒測斗牛箕細看肖貌殊清徹徐翫揮毫亦怪奇  
聞道天文脩晉志淳風會有立朝時

九月初五日

暮雨蕭蕭鼓角風草枯木落鴈橫空每逢九日不勝感  
垂近七旬無奈窮螃蟹今年猶未有茅柴我輩亦堪中

籬邊瘦菊青如粟已勝芙蓉萬朵紅

庚寅

江湖秋水事茫茫是年大水近縣猶聞有戰場多病多憂欺

此老半醒半醉了重陽見山籬下無人至戲馬臺頭幾  
客忙萬事不同時節似感今懷古倍悲涼

美許孝子并序

許公度使君悼亡後亦有疾第三東閣居母喪

侍父藥餌極勞悴迎公度寓竹所道院當暑躬

執爨治膳及秋涼父病遂愈府判孔公美之以詩韻險難賡以意和焉命題曰美許孝子云

聖善已云遠義方猶此親湏嘗許止藥未老竇郎椿竹院深床穩烟庖垢面塵曾參養曾替剩聞舞雩春

孔府判埜耘嘗宦雲南今以餘瘴多病意欲休官

因讀唐書南詔傳爲此二詩問其風俗

瑞邢州人

萬里蠶叢國西南出漏天吐蕃唐徼接越雋漢疆連參井星躔外岷峨雪界邊牂船元下粵劒棧忽朝燕驃信

狂圖歇苴咩險要鷄稱元更號謂督庾革官聯慰諭開  
行府咨諫肅使權貝仍通一覓土尚錫雙田飾齒金無  
漆充衣卉與瓊瓜匏冬更實桃杏臘尤妍混壹良堪喜  
誅求或未悛霜威才蒞止輿誦總驩然歸橐無蠻貨征  
袍有瘴煙缺曾甘鞅掌由此因沉綿柔遠華風浹同文  
譯史傳願聞談土俗王會纂周篇

漢代哀牢種瀘南大渡河其都居善闡有水號牂柯丞  
相祠諸葛將軍畏伏波石扶碑故在銅作柱難磨古但

羈縻耳今如震懾何一戎平六詔萬旅削三峩跣足遑  
機弩鞬頭敢荷戈鬼王牽駿駟泯國效文螺梵供花優  
鉢經傳葉貝多異香燃篤耨碩果噉波羅碧鈿懸珠珥  
銀鈎摘象駄深秋如夏熱窮臘亦春和霧毒飛鳶墮風  
腥巨蟒過已還生定遠猶類病維摩宦思輕髦梗閒心  
願潤阿此鄉非瘴土何幸小婆娑

丞相大觀文馬公先生

廷鸞挽詞三首并跋

四載咸淳相艱哉去國情極知幾事密或遂好謀成董

卓徵荀爽陳桓免晏嬰為公翻左漢尚覺寸丹明  
病篤辭台席明年遂失襄少容公展布豈遽國危亡此  
老為微子吾君類偃王欺孤木綿鬼寸斬亦何傷

天地干戈阻門生合會喪謂傳和相鉢有覲陸公庄衰  
鈍韋陶冶危疑去廟廊空懷精衛意無奈海茫茫

晏平仲納邑與政因陳桓子得請免於欒高之  
難公之退似之矣然木綿老鬼私以爵祿餌士  
大夫入貓蜜劔朝膝暮淵人亦不感其恩荀慈

明潛圖董氏豈特陳靜觀王脩齋留中齋王厚  
齋有是心哉顧時機未可耳回學官數除皆公  
委曲啟擬扼於噬吠不能少效愚忠而公壬申  
之病彼老姦怵迫之危懼之無所不至一去不  
再起而陳橋之業為葛嶺所掃矣甲戌乙亥丙  
子以來書問阻絕第從人問安否今聞葬又不  
能赴乃為是此三詞以寫無窮之哀云門生方

回謹跋

上南行十二首并序

何以謂之上南行吾州城南有三路右曰上南路左曰下南路中曰水南路歲庚寅十二月初五日甲戌予偕紫陽精舍王博士俊甫出上南路訪吾友曹清父故曰上南行也平明出城即渡溪曰古航渡為詩一行五里曰分流嶺為詩二行七里曰南山許宣平老仙故居在山上予癸丑從郡守魏公靜齋來遊今三十八年復過

其下魏公所築翠微亭近亦不存為詩三舊官  
榷酒出城十里始飲村醪雙橋酒稍佳今無復  
有為詩四行十五里岑山渡渡旁有一山屹立  
溪中為休寧縣港之水口山上有道人庵老樹  
葱青頗可觀為詩五行二十里杏村溪南北西  
有村名曰富登富代澤富而不見富人猶杏村  
未必有杏花也為詩六行二十五里牛屎嶺嶺  
之得名不知其故金陵王謝故居在馬糞巷而

予將訪清父乃不免過牛屎嶺乃以王謝馬糞  
方之為詩七清父所居地名曰葉有莫詳意義  
過一嶺稍穹計行三十里矣亦曰葉有嶺強為  
分別以為有根即有葉為詩八行三十五里至  
清父宅清父先尊公敬齋先生字元會鄉邦老  
儒年八十有四近物故予同俊甫炷香奠拜几  
筵高山景行有懷德人曹氏世登科者九人清  
父咸淳戊辰進士其一也為詩九終夜劇談清

父弟清叟與馬予偕俊甫對榻而清父襍被以  
來卧語至曉燈火明暗間不知身世之在斯深  
谷也為詩十初六日乙亥清父苦相留力辭得  
請還至吉林榜去岑山渡可二里俊甫曰此劉  
堂錄子文宅也予下車於外子文適開戶於內  
驚相視留僕主飯俱饜飫為詩十一既渡岑山  
又有留飯者三酌而辭斯遊多有談諧嘲謔樂  
而忘勞入城適欲暮矣為詩十二各章八句或

可相與賡和以識一時乘興之適云清父名涇  
年五十七清叟名瀟年五十三子文名演年六  
十一俊甫名國傑年三十八予為方回字萬里  
年六十四初七日丙子書於家之孚舟亭

初過城南門即過城下渡豈無小筭輿未若且徒步霜  
重船板滑水涸岸石露我老人不識小讓樵者路

右過古航渡

歷險極可畏升高宜少休嶺水東西分終亦歸同流臧

獲相爾汝借竈燃枯槱五里一酌酒聊以娛茲遊

右分流嶺

我不上南山垂近四十載山中花瓢翁尚與山俱在據  
高瞰人世昔田今為海道傍魏公亭柱化礎亦敗

右過南山

七里南山邊更作三里程十里舊權界雙橋酒有聲身  
老友朋盡事殊時代更茅店迷處所飲徒眠九京

右過雙橋

金焦大小孤號為天下奇繫此水中峯突兀頗似之千  
古幾洚水蛟龍不能移寄言甕牖士守道當如茲

右過岑山渡

溪北曰富登溪南曰富代其西曰澤富富固人所愛民  
貧今已極名實殊不對此村名杏村杏花果安在

右過杏村

昔聞馬糞巷今涉牛矢嶺無牛亦無矢步步入佳境望  
我端人居時焉一引領亦如馬糞邊王謝芳更永

右過牛矢嶺

葉有義謂何根有即葉有登嶺問地名強辨果是否我觀松柏竹青青黃落後葉有有此葉可以觀此守

右登葉有嶺

斯人近云亡華算八十四登堂拜畫像衣冠昂古製有子身不死科名今九世焉知三家村乃見萬乘器

右拜敬齋先生曹元會畫像

棄官逃世名居此深谷中谷深夜更深劇談滋無窮照

壁書燈青煨爐茶火紅門外曉鶴鳴天地號霜風

右宿曹清父宅夜話

君子貴淡交不在杯炙間主人苦留客因辭乃得還中  
道逢故舊酒肉又如山半醉可以去豈不知時艱

右飯劉子文宅

談笑復談笑竟忘早與晚翩翻凌深波恍惚度層巒醉  
身但覺輕歸路不知遠人生常如茲百年亦易遣

歲盡即事三首

久晴忽金瘡作楚襄時真州江上遇大風因躍入舟為鐵桅軸創其腰骨遇天陰欲作風雨即先腫後潰而天色始變必欲用金瘡二字成句而數日不能成聯遍思用事屬對如歐公玉顏自古為身累肉食何人為國謀此例也排奡帖妥得三詩以見無所用心之一癖云

閒門空宇日蕭蕭天地無情鬢轉凋政使面顏成菜色未應官職愛冰條藏山竹簡光陰短寄隴梅枝信息遙

不寐夜牕聽風雪枯腸殊欠一樽澆

七里灘西更上灘十年生事一漁竿故人共駭霜毛短  
俗子猶嫌鐵面寒雪屋五更天地獨梅詩一句古今難  
虛名浪得真何用空使先生刻肺肝

干戈洶湧一年間酒債何時可盡還盜起屢煽鄰縣火  
軍興全赭近城山天陰體倦金瘡痛歲儉家寒藿食艱  
最苦梅開獻求索柴扉草舍不容關

倚梅觀雪

空山浩浩朔風吹蕭颯如蓬兩鬢垂獨倚寒梅看遠雪  
合呼美酒賦新詩剡舟地迥何由往隴驛天遙亦謾思  
忽憶立年湖上事金樽銀筆永無期剡舟因雪隴驛因  
往也然所感有大於此丙辰年予三十魏靜齋明已為  
司農寺丞嘉平湖上泛雪賞梅小姬年可十五六歌晁  
无咎買陂塘詞樂甚今席上客及主人俱死朽丈矣獨予僅存

再賦倚梅觀雪以前詩太哀故

清莫清哉亦壯哉茅廬何自致瓊瑰江南勝賞無如雪  
天下難題最是梅剪水玉蛾能送瑞司花青帝想憐才

老臣詩就天顏喜叩齒當空酌一杯

梅

玉樓仙去老逋坡天下詩人奈爾何茅舍一枝元不少  
水村千樹未為多力排殺氣回元造善保陽神養內和  
暗處尋香蹤認影可容冶思羨凌波和靖東坡千樹一  
枝暗香蹤影之句  
後無能追者予以一枝不少千樹不多暗處尋香  
蹤處認影與兩公中明一番五六一聯則自得之

雪

老面臨高不畏風塵寰一變蘂珠宮驟難金碧茅茨別

預喜蝗螟瘴癘空至潔獨凝羣物表太和元在極寒中  
絕憐詩骨能禁許惟有梅梢肖此翁

十二月二十八日立春次韻王山長俊甫

餘生橄榄蠻夔求伸久作屠酥最後人萬事不關閒處眼  
三朝聊喜歲前春草芽地已回生意雪霽天應念小民  
船活東遊君決計何當同載自由身

辛卯元日三首

六十年前五歲兒夢魂歷歷萬艱危數聲春雨微中酒

絕好梅花大欠詩老病自應無世味退脩焉用要人知  
十兄弟行唯身在未可全狂且半癡

回首同庚五歲孫老夫老矣尚何言一生酒債無詩債  
數畝花園半菜園雨濱謂難來賀客馬嘶誰忽顧閒門  
倏無驟有真天相徑為茅柴覆瓦樽

十年爭席聽漁樵辦着心情耐寂寥老覺歲華殊易邁  
愁嫌日晷似難消縱無詩句題桃板也有春光到柳條  
何限貴人近俱死鎮長窮健不逍遙

寄題九華蘇君明甫夢牛亭

錢塘丞志亭記  
俞宗大德鄰作

融融洩洩非煙霧金門玉堂嚴陞桓上帝高居朝百靈  
神人真官儼無數九華種德萱堂仙許傍紅雲聽韶馥  
瓊林宴罷偃霓旌詔賜麒麟引歸路似牛非牛斯何祥  
夢覺生此玉樹郎渥洼汗馬實非馬洛洞鬚珠誰謂羊  
天上真龍世莫測例晦頭角韜晶光夢中之牛頗類此  
豈果噉芻甘服箱忠臣事君比螻蟻慈父愛子號豚犬  
鳩雌夫婦鴈兄弟託物取象意微婉冉耕伯牛司馬牛

大賢名字何赫烜得非此母奇此兒他年負重能致遠  
繡輿羽衛歸蓬萊奇徵異兆猶昭回作亭大刻夢牛記  
銀黃上冢兼榮哀函關道士駕西邁萬歲樹精焉在哉  
邂逅便當知止足拽轉鼻頭歸去來

寄仇仁近白廷玉張仲實京口當塗江陰三學正  
兼述新歲陰雨春寒有懷

同時糾正諸侯學鐺脚相鄰總鉅邦足可養廉三斛米  
未妨溫故一燈牕有人北面求宗旨無事東流送大江

向道紫陽山色好何為不肯沂溪瀧

六十五春寒吟七首

日日春寒晝掩扉驚嗟六十五年非未為白傅同州起  
猶勝坡翁海外歸斗分軍興羣盜作浙鄉水患細民飢

忍窮苟活猶聞管痛惜殘梅萬點飛

白樂天六十五同州刺史不赴封馮

翊縣侯自此分司告老東坡六十五元符庚辰自儋耳北歸

當是平生取數多窮途無力戰羣魔二千石濫知州事  
三十年羞進士科人老決難重少壯春寒畢竟漸晴和

籌來算往終無益且傍殘梅作醉歌

老眼閒中子細看天公作劇故多端雪占歲稔何曾稔  
雨作春寒斷是寒酒盡悶多歡笑少花開折易長成難  
暮年不喜金仙說到此心才悟六觀

病骨春寒欠酒澆關山滿眼鴈程遙有人恨過江淹賦  
何處魂堪宋玉招六十五翁來日短百千萬事迅風飈  
平生知己驚俱盡一影窮山伴寂寥

清曉林禽百種鳴春寒漸暖變新聲向陽死草青先蒼

解凍枯池綠再生太子四門何足怪麻姑三海自堪驚  
回頭最念兒童輩不識燈宵舊太平

麻姑謂王遠曰接待以來見東海三

為桑

田

性癖耽吟本不工平生竟復坐詩窮狀頭浪說三千字  
舉手行為七十翁夜永自憐燈是伴春寒最苦酒難中  
王侯蠻蟻終同盡便出陽神也落空

予昔廷試初取為首舉手謂五指為

五歲

知舊驚嗟踵喪亡劣容此老據藜床六旬有五猶窮健

百拙無雙但醉狂時菜連畦終歲飽種梅西屋滿家香  
不須苦怨春寒惡槽柂爐邊味最長

上元再題

梅殘萬點路傍雪桃露一班梢上紅惆悵六鼇山已去  
了無情緒答春風

送紫陽王山長俊甫如武林五首

國傑

乾淳以後學無師嘉紹厭厭士氣衰何等淫辭南嶽藁  
不祥妖讖晚唐詩三風盍遣鄭聲放一日忽驚周鼎移

歐九登庸柳七棄昭陵曾築太平基

乾淳以後葉水心倡率四靈為晚唐

詩劉後村亦為之宋此時未為晚在今日觀之乃晚宋詩也此詩識之大不祥者其老妓尋風水僧詩大鄙俗

紛紛肉食笑儒冠賴有吾徒耐歲寒心遠要期來哲共  
眼高不受俗書瞞樽前笑語窺胷次燈下工夫見筆端  
好向故都求益友歸時敢作去時看

戰鼙征騎洶人寰此道煙昏霧晦間萬世難磨朱氏學  
一官來管紫陽山窮冬碩果何曾食滄海明珠不再還  
能作春霆啟幽蟄終身我亦卷瓢顛

儒風掃地久堪哀誰與前朝養禍胎真魏無年喬鄭壽  
杜游不作董丁來游魂葛嶺人方醉轉眄陳橋業遽灰  
賴是紫陽書尚在不隨遷鼎委蒿萊

真西山魏鶴山不壽而喬行簡八十

六鄭清之七十六再相五年天下大壞其死也將再相游果山似而亦死於是董宋臣丁大全用事以訖似道  
錢塘湖上試經過便似秦淮玉樹歌突兀樓臺新佛刹  
依稀燈火舊沙河士皆戎服駢鞍馬女尚宮粧拂黛蛾  
我欲同君理輕棹蘇堤呼酒醉東坡

寄趙賓陽二首

秀亭山下舊吾廬十二年鄰長者居近別復經三換厯  
相踈不寄一行書諸郎已了婚姻未所至堪憐盜賊餘  
老我種瓜生事拙想君更苦食無魚

才踈意廣道難行深入窮山隱姓名自分一瓢終陋巷  
誰知五馬昔專城去年是處興兵甲此老無人問死生  
忽憶杜微今七十寄聲聊見不忘情

桐江續集卷十七